

بِسْمِ اللّٰهِ الرَّحْمٰنِ الرَّحِیْمِ

PELANJUTAN PENUTUPAN SEMENTARA MASJID, SURAU DAN BALAI IBADAT SELURUH NEGARA BRUNEI DARUSSALAM BAGI MINGGU KE LIMA

1. Pada menjunjung titah perkenan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam, Kementerian Hal Ehwal Ugama dengan ini memaklumkan bahawa penutupan sementara masjid-masjid, surau-sarau dan balai-balai ibadat seluruh negara yang akan berakhir pada waktu Isya' malam ini, Isnin, 20 Sya'aban 1441 Hijrah bersamaan 13 April 2020 Masehi, adalah dilanjutkan lagi selama seminggu mulai esok waktu Subuh, Selasa, 20 Sya'ban 1441 Hijrah bersamaan 14 April 2020 Masehi hingga waktu Isya', Isnin, 27 Sya'ban 1441 Hijrah bersamaan 20 April 2020 Masehi.

Ketetapan perlanjutan ini diambil dalam mesyuarat khas Majlis Ugama Islam Brunei pada hari Sabtu, 17 Sya'ban 1441 Hijrah bersamaan 11 April 2020 Masehi berdasarkan nasihat Kementerian Kesihatan bahawa walaupun keadaan wabak COVID-19 di negara kita adalah terkawal namun masih terdapat kekhuatiran tentang penularannya yang memudaratkan. Maka penutupan sementara masjid-masjid, surau-sarau dan balai-balai ibadat seluruh negara adalah bagi menghindari mudarat yang boleh mendatangkan bahaya kepada jemaah khususnya dan orang ramai 'amnya yang mana ini adalah bersesuaian dengan fatwa Mufti Kerajaan bilangan 02/2020.

Penilaian selanjutnya akan dibuat sebelum tempoh penutupan sementara ini berakhir. Oleh itu sama-samalah kita berdoa semoga Allah Subhanahu Wa Ta'ala akan melimpahkan lagi rahmat kasih sayang-Nya kepada kita sekalian untuk segera keluar daripada bahaya penularan wabak COVID-19 yang memudaratkan itu. Dengan itu kita akan kembali ke masjid-masjid, surau-sarau dan balai-balai ibadat berjemaah dan mentakmirkannya.

2. Sambil itu kita juga hendaklah meneruskan usaha bersama membendung penularan wabak yang turut melanda negara kita dengan menjaga kesihatan diri dan keluarga. Dan ditegaskan lagi terutamanya dengan mematuhi dan menuruti arahan dan nasihat-nasihat semua pihak berkenaan, khasnya pihak Kementerian Kesihatan.

Dengan itu kita sebenarnya adalah berpeluang mendapat atau meraih pahala melalui sikap dan tindakan wajar yang dituntut oleh Allah Subhanahu Wa Ta'ala supaya jangan sekali-kali melakukan apa yang disifatkannya sebagai perbuatan mencampakkan diri ke dalam kebinasaan dengan sebab atau cara melakukan sesuatu yang membahayakan ataupun sebaliknya tidak mematuhi arahan, suruhan dan perintah yang dituntut supaya dilakukan. Firman Allah sebahagian ayat 195 Surah al-Baqarah:

" وَلَا تُلْقُوا بِأَيْدِيكُمْ إِلَى التَّهْلُكَةِ "

dan mafhumnya: "janganlah kamu sengaja menjerumuskan diri kamu sendiri ke dalam kebinasaan."

3. Dalam kesempatan ini, Kementerian Hal Ehwal Ugama sukacita mengalu-alukan beberapa *trend* baru berupa inisiatif berkebajikan yang dilaksanakan oleh beberapa pihak dari kalangan jemaah takmir masjid iaitu aktiviti bermanfaat dan mendatangkan pahala dalam suasana penutupan masjid. Baru-baru ini, Ahli-ahli Jawatankuasa Takmir Masjid dan jemaah Masjid Rashidah Sa'adatul Bolkiah Kampong Sungai Akar telah mengadakan sesi tasmeh' dan bertadarus al-Quran secara *online*. Inisiatif ini amat baik untuk orang ramai ikut sama melakukannya dalam suasana mengisi masa terluang di rumah masing-masing sambil mendapat ganjaran pahala daripada Allah Subhanahu Wa Ta'ala.
4. Kementerian Hal Ehwal Ugama juga sukacita mengalu-alukan inisiatif kalangan ilmuan ugama seperti ahli-ahli Rabitah Antarabangsa Alumni Al-Azhar Brunei Darussalam yang menyiarkan ceramah ugama ringkas melalui media sosial.

5. Kementerian Hal Ehwal Ugama juga sukacita mengalu-alukan inisiatif kelas-kelas al-Quran secara *online* yang diungkayahkan oleh *Nadi Quranic Learning Centre* dan *Al-Huffaz Managment* yang menawarkan kelas al-Quran secara *online* dan juga kelas Iqra dan Tarannum al-Quran oleh Kumpulan An-Naghom yang terdiri daripada beberapa qari-qari dan guru-guru ugama bagi meneruskan kegiatan pembelajaran al-Quran di kalangan orang ramai agar tidak terhenti dalam suasana sekarang ini. Kumpulan An-Naghom ini juga mengambil inisiatif mengadakan bacaan surah Yaasiin dan doa tolak bala secara *live* setiap hari Isnin hingga Khamis jam 8.30 malam.
6. Kementerian Hal Ehwal Ugama dalam masa yang masa mengalu-alukan dan seterusnya mengucapkan penghargaan dan terima kasih kepada 36 buah syarikat di bawah penyelarasan Jabatan Perdana Menteri, Kementerian Hal Ehwal Ugama dan Kementerian Pembangunan yang tampil membersihkan kawasan sebahagian besar masjid seluruh negara di kawasan luar masjid termasuklah juga tempat-tempat berwudhu dan bilik-bilik air. Sumbangan yang amat bermakna ini amat kita alu-alukan dan kita hargai, semoga Allah Subhanahu Wa Ta'ala akan mengirannya sebagai amal kebajikan dunia dan akhirat.
7. Seperti itu juga, Kementerian Hal Ehwal Ugama sukacita merakamkan setinggi-tinggi penghargaan dan terima kasih kepada beberapa individu, persatuan-persatuan dan syarikat-syarikat yang memberikan sumbangan berupa peralatan seperti thermometer dan alat-alat pembersihan sebagai persiapan masjid-masjid apabila ia dibuka dan akan digunakan nanti iaitu sebagaimana yang diusahakan oleh Jabatan Hal Ehwal Masjid, Kementerian Hal Ehwal Ugama.

-TAMAT-

Rujukan: KHEU/BPA/PR/APR/2020

Tarikh: 19hb Sya'ban 1441H bersamaan 13hb April 2020M